

Demostrando grandeza

Minister Rudy Croes a reconocé cu el a cometé un error

Nos lo tin carnaval sin tumba, sin calypso



ORANJESTAD - Minister di Husticia, Rudy Croes a muestra su grandeza ayera, ora cu el a admití di a cometé un error dor di otorgá permiso na ASOMA pa cu organizacion di festivalnan di tumba, calypso y roadmarch.

E hecho cu e mandatario a reconocé su error, a pone haya e reconocimiento público, pero den mesun rosea a surgi e pregunta, si otronan di su coleganan lo por haci mescos.

Minister Rudy Croes a bisa cu unda cu ta worde trahá foutnan ta worde hací. E kier a haci un bon, pa caba loke el a yama e "desastre" di nos Carnaval, esta e confínno pelea entre ASOMA y SAC.

Otorgando e permiso na ASOMA, el a pensa riba e hecho pa laga Carnaval pa SAC y músico pa e músiconan, esta ASOMA. Reconociendo su error, y e hecho cu

a recomendá Mando Policial reuní cu e dos gruponan aki pa sali for di e impasse, e mandatario ta spera cu a pone un punto final na tur e desunion aki.

T'asina tur permiso pa loke ta mantencion di orden público y tambe actividadnan festivo, ta regardá Ministerio di Asuntonan General, y a pasa e autoridad aki pa Mando Policial. Ta di e forma aki SAC ta hayando tur permiso. Manera a bin ta tumando lugar pa hopi aña caba.

E hecho aki a indigná músiconan y ainda promé cu e reunion di ayera tardi por a tende cu si ASOMA no tin e permiso mas y si ta keda na SAC pa organizá e festivalnan, anto ningun agrupacion musical lo no participá na ningun di e eventonan di SAC.

Pero ayera tardi Mando Policial a manda invitá e dos partidonan pa reuní pa yega

na un acuerdo definitivo. Semper y cuando si tin bon voluntad.

SAC sin ASOMA

For di e reunion aki a sali na cla cu no tabatin ningun hende di bon voluntad. Conclusion di e reunion di ayera ta cu a retirá permiso otorgá na ASOMA.

Mientrastanto ASOMA tabata kier sa kico ta e posicion di SAC, e.o. encunto reparticion di ganashi di e festivalnan. Den e reunion aki a ser bisá cu ya e acuerdo di 50-50 no ta válido mas.

SAC ta keda cu 100% di ganashi y tumando e posicion intransigente aki, ASOMA tin te awor mandato di su miembrecá cu nan lo no participá na ningun actividad di SAC.

Pues manera e situacion ta te awor, Aruba por bai celebrá su di 40 Carnaval, sin un roadmarch, calypso of tumba.

Palabra ta awor na SAC si nan ta reconsiderá nan posicion pa ainda haya ASOMA den nan actividadnan, pero saliendo for di punto di bista cu acuerdo di 50-50.